

TEKUN Nasional tumpu perniagaan risiko rendah

Tabung Ekonomi Kumpulan Usaha Niaga Nasional (TEKUN Nasional) akan memberikan lebih tumpuan dalam menyalurkan pembiayaan kepada usahawan yang menjalankan perniagaan berisiko rendah, namun menjana pulangan tinggi pada tahun ini.

Pengarah Urusan dan Ketua Pegawai Eksekutif, Datuk Baharom Embi, berkata langkah itu dilihat sangat berkesan dalam mendapatkan pembayaran balik pembiayaan usahawan, yang mana ia terbukti apabila TEKUN Nasional merekodkan bayaran balik RM554.6 juta melebihi sasaran ditetapkan RM540 juta pada tahun lalu.

Katanya, prestasi pembayaran balik yang positif itu akan membolehkan TEKUN Nasional memberikan pembiayaan kepada lebih ramai usahawan mikro yang memerlukan.

TEKUN Nasional juga, katanya akan memberi fokus kepada Skim Pembiayaan TEMAN TEKUN bagi membantu usahawan mikro



Baharom Embi

tempatan lebih berdaya saing dan maju dalam perniagaan masing-masing.

Lahir usahawan berkualiti tinggi

"Strategi kami ini diyakini mampu melahirkan usahawan berkualiti tinggi yang memiliki potensi perniagaan baik dan komitmen dalam melakukan pembayaran balik pembiayaan, sekali gus menyumbang kepada prestasi positif TEKUN Nasional pada tahun ini," katanya di Kuala Lumpur, baru-baru ini.

Skim Pembiayaan TEMAN TEKUN antara inisiatif TEKUN yang menggunakan konsep berkumpu-

lan bagi mendapatkan kemudahan pembiayaan lebih mudah, cepat dan efisien.

Ia menawarkan pembiayaan RM1,000 hingga RM10,000 dan RM20,000 bagi pembiayaan seterusnya yang mana skim terbabit mewajibkan setiap usahawan dalam kumpulan itu melakukan pembayaran balik secara konsisten.

Mengulas lanjut, Baharom berkata, TEKUN Nasional sudah melakukan transformasi sejak tiga tahun lalu dengan fokus membangunkan produk pembiayaan yang boleh digunakan oleh usahawan, namun tidak menawarkan risiko tinggi dan memberi impak kepada kadar pembiayaan tidak berbayar (NPF).

"Pendekatan TEKUN Nasional dalam memilih perniagaan berisiko rendah dan melaksanakan skim seumpama ini dilihat membantu kami mengawal kadar NPF yang berada dalam keadaan baik pada tahun lalu berbanding 2016," katanya.